

江西彭澤袁梅谷纂緝

雍正庚戌年新鐫

石樓縣志

序抄石樓縣志

夫人有志閱書而有書者吾聞之矣有志閱書而無書者吾未之聞也然有志固能有書而往往始終不達先後難及雖有志而不能達非必志不能才不足而棄之此有心不立者之所以不慨見也今於閱書見之矣余農家之也貧寒無資有志閱古書往往弗得一日見友人石邑縣志一書蓋縣有志猶國有史家有譜同欲知國之大事須參考史書欲使家道整序須修家譜即縣之星象山川風水位置人物錢穀倉庫城郭學校鄉村以至古寺殘碑稿梁邱壟暨創建之時日仕

宦之更替雖一草一木一菽一粟尤可知而  
明之於是借而閱之約定言還期閱之甚有  
興趣弗忍棄之但不肯失其信應如何矣深  
而思之我人以購夫縣志刷於縣印書局必  
無之是以細挾縣有舊版重新印之殊不知  
縣無善人君子將版失之幾盡未能達其志  
噫有志閱書而書不克始終難澈等於不閱  
雖然古之刷斯書者亦筆書之然後刷之豈  
不書而竟刷耶曰否然則余有志親做書之  
而便於始終輒閱也不特余便之即再有繼  
余之志者尤便之是自丁卯年二月上旬始書  
首卷卷有邑之名勝之圖風景可愛神難禁

矣無奈素習於字未習於畫實難措圖以此  
言之書其字舍其圖曰不然凡事由難而易  
由易而成即以不能寧以能之於下旬告竣  
遂繼二卷載註庸庸惟典禮一事實為古今  
之特事叙之詳明三月上旬三卷又遂繼之  
書至褚鄭諸公以及薛呼之忠覺其邑之賢  
豪君子超勝於他邦倍蕞獨地瘠民貧風俗  
尚勤中旬四卷更遂繼之念彼昔之朝廷愛  
民猶子保民如赤訓學子勤工讀尤望文風  
大振科第蟬聯真所謂不世出之明君也四  
月卷五卷六亦先後繼之知曉

周袁二侯治斯土誠知斯民之艱苦猶已之

艱苦於是不避險懼革弊興利遂申詳文懇  
請

上憲俯恤蟻民共體斯意邑民享福萬壽無  
疆迄五六已終值為暑假臨邛於是輟筆助  
耕而斯志仍常有之假滿來校復繼書之而  
七卷之祭表精妙雖有其文真有其神有禱  
即應惟是陋俗不去利益難興而乃

袁侯巍巍訓示速除迅振度邑之濃味蒸蒸  
更勝於他邦倍蓰至於八卷銘歌序詩各載  
明確真有西蜀之雲亭南陽諸葛廬以及赤  
壁之遊樂桃花園漁之快况雖不得赴黃雲  
山之遊樂然歌之猶覺黃雲山也詩不能知

有序知之咏詩者先視其序今不重於詩而重於話乃邑之名勝古景以詩鳴之尤以詩揚之且夫斯書共成八帙誰成之乎清雍正年邑宰

袁明侯令澤斯土所以成之也彼公之成此書亦不為易易余今雖不能繼公之成重成之亦不得不為公之書參閱之是則課餘抽暇有志書之而得永久輒閱尤願後有繼公之成更成之余深厚望焉夫遂成於中秋上旬序於望日賞月之際民國十二年端月本縣第一高等小學校畢業遂任二區留村初級小學教員樂亭劉成智自撰并書

民國十六年八月十五日序

序

吾友袁子梅谷纂修石樓之志既成繕為八  
帙都諸志而三其藝文獨居五甚矣袁子之  
湛於文而嗜也夫志猶諸史無亦惟詳搜核  
討求得往昔遺事闡賢人君子之幽俾信而  
可傳以不沒於後世則亦已矣豈其掇藻撫  
撫績而求擅於英華之場將天下寵其文而  
究何得於古之人與事也然言之不文其行  
不遠惡夫所言之事不能按真肖曲而其入  
之始終本末適掩於固陋畔散之詞天下讀  
其文以為慚後世安所據而信之古之所稱  
良史獨司馬子長絕冠惟其以曠代之才縱

橫上下古今之林每傳一人吞吐騁頓曲寫  
乎事之所難明假令移其人與事而屬班范  
以下諸手為之其同不同固未可知故當時  
之人物事蹟得托於子長之文不可謂非遭  
逢之獨幸文亦何累於道哉且其所謂文原  
非徒競於詞而以掇藻摭績為足以當之也  
禹貢一書不遺壤植墳墟以至篠簜籥簠龜  
蠙齒革羽毛之屬罔弗備具而周官職方所  
載其瑣羅織列往往近是皆無意於文而為  
天下後世能文之士所莫及子長惟有得於  
此故辨而不華質而不俚范蔚宗乃自謂體  
大思精誠雄其文之甚然似著書自為文者

之言非所例於左右史之記言動其於禹貢  
周職方之意為間矣知此意者可與論志史  
之文也袁子以名進士起家文章擅海內來令  
石樓起殘救敝澤物阜民循政次第舉而獨  
於文教之興為三致意誠念石邑僻在萬山  
中曩數被於兵不沐以詩書禮樂之化民將  
野健而逞悍然弗率長上之教然不使之窮  
經為文庸詎知詩書禮樂為何物也故立學  
課藝朔望講貫之暇復有事於志之役今閱  
所志星野津梁戶口鄉村風俗之最瑣細者  
亦莫不燦然有文可誦而藝文所載則又不  
過表揚忠孝節義為百姓疾苦請命期無失

悅安強教之意而已焉而未嘗徒以文自鳴  
者固在此也昔文翁治蜀日導其俗與文從  
事而蜀士習為之大振今石士之興起者豈  
不駸駸漸澤於雅乎遲之數十年後行且家  
絃戶誦有文行命世之英接踵繼出炳焉得  
儕於三代兩漢之選者知必自袁子今日始  
然則學不通於治信不足為文故吏如袁子  
可與言治文夫志如之文猶諸史也吾請以茲志  
之序質諸袁子而繼今與之言史 峇

雍正庚戌菊月

賜進士出身翰林院檢討年家同學弟王璠

拜題

序

士君子窮視其所守達視其所為不失其守  
而能有為者吾聞之矣失其守而能有為者  
吾未之聞也然有守固能有為而往往始終  
易轍前後不侔窮雖有守而達不能有為非  
必才不足守不定而失之此有道不變者之  
所以不概見也今於石樓 袁侯見之矣侯  
古彭知名士也與余為文章道義之交迄今  
三十餘載竊見其生平甘淡泊嚴取予重然  
諾留心當世之務而慈祥惻怛又其天性然  
也私心佩服而效法之已非一日今令石樓  
石環邑皆山民貧賦重地僻人稀無着之積

逋至萬數千餘金雖巧婦豈能做無米之炊侯  
為石民計長久欲使無着之糧有着力請借牛  
種以開新荒緩陞科以補舊欠分年開墾而民  
力不勞減半催以副收而完公亦易扣養廉奏限勸鄉井以相扶持  
種逋清而庭無敲扑流亡集而民享盈寧上裕

國課下利民生即此一端石民之食其福者固無  
窮矣至於條陳利弊革除陋規修城池建倉  
廩葺學宮護廟宇立義學以訓生儒嚴考課  
以興文教停捐銀入籍之例請均撥府學之  
條革樂籍以維風俗留花布以給孤貧買隙  
地以葬難民之枯骨置義田以祭無主之游  
魂求豁長餘之賦乞免缺額之丁他如詳窮

差工食之不敷准迷失人民之入籍種種善政  
更樸難終迨至百廢既興更念邑志為文獻所  
徵自前周侯纂脩歷年七十有餘散佚無復存  
者侯乃採舊文訪故老收拾補輯使山川風土  
人物井疆燦然具列誠盛典也夫躬勤勞冒  
霜雪履畝稽查揆情度勢使民踴躍急公此  
非素留心當世之務者能之乎惟其甘淡泊  
斯能捐養廉之資以辦公惟其嚴取予斯能  
革公應之陋以自潔惟其重然諾斯能取信  
於

上憲信於兆人而為其所欲為惟其慈祥惻怛

○<sup>本</sup>於天性斯能惓惓視民如傷為之計長久而

不置夫達之所為必視乎窮之所守若侯誠  
可謂有道不變者矣然非

朝廷知人善任

各憲培養曲誠亦安能使有志之士試牛刀於  
盤錯荒僻之邑沐化日之舒長也哉然則侯  
之得以展其才奏其績者正以遇

明良在上無掣其肘而後能能相與以有成也余  
讀石志不禁懽忻鼓舞為候慶遭際之隆而  
弁言於簡末以告後來治石之君子尚冀其  
因時制宜興利除弊亦如侯之為民訐長久  
則石民之食福自侯始將不自侯止也已

雍正十年壬子歲春王正月上元日江寧許泰交拜撰

## 石樓縣志序

郡邑之有志猶國之有史家之有譜雖小大詳畧各別其備紀載垂久遠則一也天下列為郡縣如百體効順一邑不備則全體不具邑乘曷可少哉夫子刪書斷自唐虞下迄秦誓千古一大史書耳周禮小史掌邦國之志志者記也春秋所謂周志國語所謂鄭書孟氏所謂晉乘他若孔安國九州之志謂之九邱邱者聚也言九州之所有土地所生風氣所宜皆聚此書韓宣子觀書太史氏曰周禮盡在魯矣一國之史即一國之典禮一邑之志即一邑之典禮其重有如此者然而世之好詳者鑿

畧者缺甚至附會已意浮而鮮實華而弗質  
質俚而弗辨劉知幾云必兼才學識三者之  
長始足以任此揭奚斯謂心術正者然後用  
之可也一邑者天下之象其志寧可忽哉我  
國家擴疆開土以道化成幅幘廣袤唐虞三代  
未有若斯之極盛者恭逢

聖天子御極以來日星呈瑞河岳効靈窮陬僻壤  
漸摩至治靡不戴昇平而難名大化茲叨

各憲風清弊絕時和年豐徧徵邑志以記全盛

石雖僻處山隅民風淳樸猶有陶唐氏之遺  
意焉其感之也更速但前遭闖賊殘燹居民

逃竄舊志已亡順治十五年邑宰周士章於

灰燼之餘搜殘拾遺纂輯舊志僅存什一於  
千百已耳閱今七十餘年余甫下車即欲纂  
邑志奈積逋萬餘逃亡未復撫字為艱適值  
軍需三次旦夕勤勞無暇寸晷兼以樵爨庸  
材不敢謬為增省今第就所見聞訪故老搜  
殘碣拾遺篇實紀其地之星象山川風土人  
錢穀倉庫城郭學校鄉村以至古寺殘碑槁  
梁邱壘暨創建之時日仕宦之更替雖一草  
一木一菽一粟必驗其土地所生風氣所宜  
山川之鍾毓蹊徑之易嶮靡不備載己酉季  
冬仝秦子燮偕邑紳士鄭炯等閱數月餘徵  
其文核其事其實有補於吏治民生者寧叙

勿畧至荒殘不可稽者寧缺毋濫粵稽春秋  
盟密甲戌夏五己丑之顛曰缺文蓋言慎也  
昔司馬遷傳記其文直其事核不虛美不隱  
惡謂之實錄石志敢云傳記哉但因其地以  
備記其事因其俗以實紀其宜不敢以己意  
為增減古者太史採詩以觀民風司市納賈  
以觀民好惡石小邑猶百體之髮膚以備毫  
末採風不遺之意云爾是為序

峇

雍正八年歲庚戌桂月

賜進山身知石樓縣事江右古鼓袁學謨撰

石樓縣志卷之首

舊志序

朱之俊

古者王國有採風之典車轍所屆太史陳其詩歌而獻之於天子以聽黜陟故其風土人物與草木山川皆付之史官而播諸篇什至今讀齊秦鄭衛唐陳曹檜之詩其俗尚之貞淫物土之腴瘠瞭然如視螺文不亂迨郡縣之制興後之作史者往往取稗官家乘以摭拾其要領使城郭溝洫錢穀兵農以至薦紳先生之出處孝子節婦之風烈無不熟悉於胸中而後芟繁就簡恢張潤色以成一代之書甚矣志之有功於史也吾汾為晉陽之都會山川奇勝人物勤儉尚有陶唐氏之遺而石樓僻處西偏○山為環衛礪陜之地屢厭兵燹蒞斯土者每艱於保障邑侯周公名籍東吳其文章議論宏博淵渟殆不可窺較丙申夏出宰茲邑邑之士聞其風而慕望其光而敬以親觀於其俗而婚喪飲食皆中節入里門而長幼雍雍然循阡度陌而鱗繡錯比所謂豪駟市猾為民害者固無不鳥獸

散也迺公素負著作材又慮其身撫茲土而不能  
舉其地之籍以示後人也於鳴琴之暇復搜石之  
舊志於灰劫之中以釐訂而增益之心營手畫越  
歲書成問序於予夫予抱疴泉石久矣何足言闕  
外事然吾聞地以人著人以文彰通都大郡廣谷  
巨川不得其人以治之一過焉而墟矣若夫奇偉  
非常魁閎杰出之流偶一試割為之修明禮樂移  
易其風化之所趨而更表其山川文物以載之圖  
冊勒之金石於不衰則雖窮荒塞徼之鄉蝸廬黑  
予之地亦煥然表著於千萬年之間然則茲邑之  
有賴於公者豈淺鮮哉雖然天下事不患於不成  
而患於難繼後之君子覽斯志也攷其城堡之何  
以繕葺徭役之何以平權課之何以蠲貸士風民  
民俗之何以培養尤而效之俾勿壞是公之德澤  
汪濊於石民者固百世不朽也順治戊戌中秋

周士章

夫治國邑者始於尚書之禹貢與周禮之職方而  
班孟堅因之作漢地理志厥後著述家祖之邑自

為載郡自為紀皆命之曰志於以網羅舊聞而徵  
信後世甚矣夫著述之難也志者經之裔而史之  
翼也識其大則以恢黃圖識其小則以廣青箱譬  
之粵鑄燕函各適其用鶴長鳧短各因其宜不可  
誣也禹貢所紀田賦高下赤黎墳壚以至篠簜篳  
籥龜魚之細周禮則及於山藪川澤男女畜擾之  
粗而班孟堅則又詳於政治風俗奢儉緩急之故  
其宗尚雖不同總以備後人之叅稽證引則一也  
余一行作令在涪州之石樓邑昔春秋晉獻公封  
子夷吾於此即所云古屈地也邑在萬山深處處  
風土涼薄人物鮮少民居陶穴不飾棟宇即士子  
習詩書者亦落落無多人余嘗讀詩至魏之伐檀  
有勤之德唐之蟋蟀有險之德汾都在唐魏之交  
昔為堯舜禹郊圻而又密邇文王之化其後卜子  
夏以孔子高弟退老西河以講明詩教故屈邑諸  
士民猶有勤儉遺風文學遺教焉但此地逼近秦  
境而城池失陷者三崇正五年與十七年兩失於  
闖賊黨羽我

清龍飛之六年復有弄兵潢池之叛逆黃進祿兵燹之餘人民被戮者十之九併宮室圖書罔有存留縣志亦化灰燼自余蒞任首為剔蠹均賦弭盜詰逃修舉鄉約肅清保甲而邑境安堵更為之乎徭減引通行商廣貿易招勸開墾流亡漸次歸土修學課士風俗一為丕變嗟乎以隻身荒鄙備歷辛艱行事具在不可不謂殫厥心矣然親歷其地而不能舉其籍余之責也但文獻不足而典故一無可稽因為廣蒐遺編周咨鄉老退食之暇手自裒輯耳目所及漁網而標列之其間山川之幽奇人物之俶儻以及司廨寺觀邱墟橋梁草木魚鳥之細無不筆而存之雖博而未整踈而多漏然而刪繁就簡舉大畧小譬之入市者不目夫梁稷而目珍異入廟者不觀夫牲牲而觀禮樂余輯志之意不其然乎萃羣勝於寸眸臚千載於一朝良匪易易矣嗟乎作令之苦未有如余者也山城斗大承凋敝之餘黽勉撫綏拔茶千樹置水一庭馮元淑馬無芻豆范萊蕪釜中生魚余之事也若夫鳴琴

堂上栽花滿城余則未遑敬俟後之君子倘後之  
覽是書者鑒子一片熱腸不獨山川人物為之增  
價其以奠民生益治道或不無少補云志成爰以  
數言弁其首順治十有五年秋七月朔日

姜宗呂

天下無不可為之事第視其為之之人何如耳乃  
或謂事有可為必待心與力克副力與時相乘始  
獲有濟此皆顧瞻因循之念中之於中決非矯然  
自命者之所肯甘焉而止也顧國之事莫大於史  
邑之事莫大於志蓋繼往開來使上下千百年○  
間之事蹟人物沿革損益晰如指掌繫史與志之  
功是賴迺時與力弗協亦徒付之咨嗟太息無可  
如何而已矣此石志之成終有待於今日也石有  
志其來已久祇因闖逆發難石首攫之遂燬於明  
季之壬申三十年來文獻無徵典籍淪沒以致邑  
紀少隳猾者舞文頑者梗法孱懦者疾首而重足  
政益以蠹民益以疲被野殘鴻幾無集澤之望矣  
江左周侯以丙申歲來牧茲土文章政事卓越倫

表甫下車即洞情俗如觀火擊猾者振頑者煦濡  
孱懦者未晷而皆以完仆以起石甿荷有造矣因  
慨邑志久亡考証罔據雖目前瘡痍少甦而一段  
拮据弗遑之槩不能舉以示後使後之視今猶今  
之視昔將無仍墮顧瞻因循之見與顧

國家方有事於西南軍興旁午供億浩煩督徵之檄

<sup>如</sup>雨有司苦奔命之不暇且也汎泉浸薪殿屎未息

<sup>悲</sup>絲穀泣斗箕時艱力絀惟今日為甚亦奚能有為

有志竟成也候曰否否是存乎人寧時與力之足

窮爰毅然以修復為已責公餘蒐羅放失諮諏典

故研精覃思編輯<sup>輯</sup>而纂定之復割俸為劖劘之費

經年役竣簡而核詳而有要綱舉目張余終卷而

歎曰茲非未燬之前所稱緗簡縹囊哀然成帙者

乎又非既燬之後所為隨颺逐焰與劫俱灰者乎

乃一旦舊觀增嫩新裁競妍伊誰之能而令茲久

湮之典煌煌稱盛焉<sup>也</sup>堪不朽矣抑更有進者石僻

踞羣巔之中地界唐魏俗亦兼之且山童水礫盈

望石田樸而寡文農而不力居業無安土之思謀

生祇旦夕之計今得易流亡為生聚化鄙僿而雍  
容其中補掾調劑之苦衷志中已畧見一班焉願  
繼此而興者引而長之將見規模具存儀型不遠  
治日隆而風日易園桃山樞之什庶乎其可以不  
詠矣順治戊戌臘月

石樓縣志

纂輯姓氏

鑒定

汾州府知府丙戌進士沈一葵 南崖 福建詔安縣人

纂修

石樓縣知縣甲辰進士袁學謨 梅谷 江西彭澤縣人

校正

石樓縣掌印城守守備劉文煥 聖章 陝西榆林州人

石樓縣儒學訓導貢生宋國相 勲宰 寧武府偏關人

石樓營左司把總劉進義 顯德 大同左雲縣人

石樓縣典史陳士俊 熊占 浙江會稽縣人

編輯

國子監監生秦燮 協和 浙江慈谿縣人

候選主簿鄭炯 炳南 本縣崇文坊人

參閱

國子監監生袁大正 懷義 江西彭澤縣人

歲貢生鄭煜 燦南 本縣崇文坊人

繕錄

廩監生

廩膳生

鄭燈子傳崇文坊人

任錫嘏崇文坊人

許令譽子揚崇文坊人

李映書洛瑞東莊里人

王謨禹書崇文坊人

廣生張瑀石公上吳里人

賈存善崇文坊人

劉月桂上吳里人

趙世法行遠崇文坊人

附學生

鄭韶九奏崇文坊人

劉灝再素上吳里人

許令尹子文崇文坊人

王誼聖品崇文坊人

賀錞留村里人

監刊

儒童

鄭貽後崇文坊人

孟紹泗魯澄上吳里人

趙金壁雙美崇文坊人

# 石樓縣志

## 凡例十則

一 纂輯體式悉照廣輿記條則雖參考不易然仍遵體要或有增減而規制不敢稍違焉

一 紀事先統綱領後分條目各列小引以晰志事未逮之意也

一 沿革舊置自禹貢周禮職方以及歷代廢興必詳載之存其故實以備後人之考核也

一 詞祀合祀乎典者另列一第近今新建者亦宜增入其餘寺觀舊志所載未敢妄刪故錄而附之俾

## 知所考

一 名宦存善可以示勸今特另叙亦表而出之意也

一 人物選舉有片長可錄者則詳註於名下不沒其善也

一 忠孝節義乃乾坤之正氣其有己未曾經旌獎者既傳其實宜表其名槩錄以勵風化

一 古蹟邱墓仙釋災祥不無附會而多怪誕雖有

所聞寧闕其疑傳信必書以垂久遠

一藝文有關於吏治民生者皆書之至於著作題咏  
雖無益於政事然人文亦有不可泯者故特錄之

一全志村庄坊表風俗土產之類為舊志所未及者  
今臚列而增入焉寧詳無簡以備考稽